

LUZIAN... MOCH

GRAIN baño sasoi obia nekarren, 1862-ko igande goiz batian, nere lagunakiñ portale zarretik murru ondoko pelota jokura gin-juazenian. Jokatu biar genduben partiduba ustez patrikeran genekan, baña..... patrikeratik itzul egin zigun.

Ez zan orain bezela urdiñik eta gorririk, ez ta ere *tongorik* eta beste gaurko eguneko saltzik, eta..... ez ta nai ere.

Kontrariyuak genituben Anbro-sio Istillarte sakatzalle zala, Juan Maria Groch, Jose Ramon Sagardia eta Bautista Goroztiaga.

Eta guriak berriz: Bautista Soto (maisuba), Santiago Zabaleta, Ramon Artola eta ni sakatzalle.

Batzubetatik eta bestietatik, bizi geranak, illian erretena erreñ ateratzeko tankeran arkitzen gera.

Panparroi jua giñan pelota jokura. Onuntzian baño aruntzian panparroyago.

Luzian genduben partiduba; bai, luzian zan, baña gu moch gelditu giñan, oso moch.

¡Ain moch! Zanpa, zanpa egin ginduzten! ¡Ez ziguten bururik alchatzen ere utzi!

Azkenian Ramón Artola gisarajuak besua autzi ta Petrikillo-ren gana jua biar izan zuben antolatzerara.

Alaz guztiz, besua iya galduban ibilliyagatik umore ona ez zuben



batere galdu, eta jarri zituben, neurtitz batzuben, atzo artzaldekuak balira bezela goguan dakazkitenak. Ala nola ziran:



Gure kontrariyua sakalariya, askok bildurra diyon jokalariya. Ez gera gauza arrentzat bera sobra danentzat esagutuba daukagu pelotari ontzat.

A zer pelotariyak nere lagunak Gu gera, partiduba galdu degunak. Batek jotzen ez bazuben, bestiak ikutzen etzuben.... ¡Aiza pelotak gu gandik eskapatzen zuben!

Partidu bat pelotan (geren kaltian) jokatu degu aurten jai goiz batian Lau lau tara giñan azi maisubentak irabazi. Galtzalliak obe degu geyago ikasi.

Bederatzi jokuban, iru ta treinta, ginduzten gu atera oso ler egin ta; lau falta sei utz egin ondo jo ta ezin kintse egin, «tranpiyan ari al giñan» ziguten ots egin.

Esana gati kalkarri: «or bertan egon ari», pelota ikusi orduko guztiyok jo nai «Utzi utzi» «Au neretzat» Al zubenak nor beretzat. Guchi jo nituben pena oraindik juan etzait.

JOSÉ ZAPIRAIN

